

Campagna per ils parcs svizzers

Cuntradas unicis en Vossa vischinanza

■ (cc) L'Uffizi federal d'ambient Ufam instradescha ils 21 da matg 2012 la campagna da placats «Ils parcs svizzers – Adina en Vossa vischinanza». Cun questa campagna vul la confederaziun infurmar la populaziun davart ils parcs en Svizra. Tant las visitadras ed ils visitaders sco las persunas che vivan en las regiuns dals parcs duain savair tge ch'els parcs èn, nua ch'els sa chattan, tge offertas ed aventuras ch'els porschan e quant ch'els prestan per la biodiversità e per il svilup duravel da las regiuns. La

cussegliera federala Doris Leuthard ha preschentà a las medias ils placats da la campagna ils 15 da matg a Berna.

La diversità da cuntradas è caracteristica per la Svizra. Dapi tschintg onns dat l'Uffizi federal d'ambient il label «parc d'importanza naziunala» a cuntradas e spazis vitals che han ina valur natirala e culturala unica per la Svizra. Quest label datti per ils novs parcs naziunals, per ils parcs natirals regiunals e per ils parcs natirals da recreaziun. La confederaziun promova cun subsidis finanzia

cun quest label (vair il quaderet: La marca «ils parcs svizzers») la creaziun, la gestiun e la qualità dals parcs. Tenor l'incumbensa parlamentara vegnan renconuschids mo quels parcs ch'èn vegnids creads a basa d'iniziativas da la populaziun locala e che han uschia ina legitimaiziun democratica.

Giudair la natira en tutta vischinanza

Cun la campagna da placats «Ils parcs Svizzers – Adina en Vossa vischinanza» infurmescha l'Ufam per incumbensa dal

cussegl federal la populaziun davart ils parcs ed el motivescha da visitar ed emprendre d'enconuscher els. La cussegliera federala Doris Leuthard ha scuvernà l'emprim placat e lantschà uffizialmain la campagna en occasiun da la conferenza da medias ils 15 da matg 2012 a Berna. Ils placats en quatter linguas e cun quatter sujets differents vegnan pendids or en tut la Svizra a partir dals 21 da matg 2012. Ultra da quai pon ins er empustar gratuitamain ina charta infurmativa davart ils parcs svizzers. La campagna dura

in onn. Ella duai infurmar las visitadras ed ils visitaders dals parcs, ma er la populaziun che viva en las regiuns dals parcs davart las caracteristicas e purschidas dals parcs. Ils parcs ch'èn vegnids creads fin ussa sa chattan en tut las parts dal pajais ed els èn figt bain cuntanschibels.

Actualmain èn averts gia indesch «parcs d'importanza naziunala», sis ulteriurs parcs sa chattan en il process da creaziun. En ils proxims onns spetgan ins anc dapli dumondas per crear parcs.



Cuss. federala Doris Leuthard e Bruno Oberle, directur dal Bafu, han preschentà ier ils placats per far reclama per ils parcs. KEYSTONE

La marca «ils parcs svizzers»

Ils parcs che survegnan il label duain vegnir intermediads a la populaziun grazia a la marca «ils parcs svizzers». Infurmaziuns davart questa marca, davart la campagna e davart ils parcs svizzers chattan ins sin il portal d'internet ww.parc-svizzers.ch.

La marca stat per las valurs dals parcs svizzers

– Ils parcs d'importanza natirala èn cuntradas natiralas e culturalas da gronda valur per la Svizra. I sa tracta da spazis vitals intacts e figt diversifitgads, per part natirals e per part er creads dals umans en maniera duravla.

– La populaziun da las vischnancas ch'appartegnan als parcs è superbia da questa ierta culturala e natirala extraordinaria. Ella s'impegna da mantegnair questa ierta e da nizzegiar ella cun respect. La creaziun e la gestiun d'in parc sa basan sin la voluntad ex-

plicita da la populaziun e da las autoritads.

– La confederaziun garantescha la qualità dals parcs. Ella attribuescha il label «parc d'importanza naziunala» ch'è al medem temp ina qualificaziun ed ina incumbensa: Ils parcs possedan cuntradas da gronda valur natirala e culturala, els ston dentant er porscher in program coerent per proteger a lunga vista e sviluppar duravlamain la regiun.

– A las visitadras ed als visitaders porschan ils parcs aventuras autenticas en la natira, istorgias fascinantas, contacts cun la populaziun e spezialitads regiunals per giudair.

– Grazia a lur autenticità èn ils parcs ina pussaivladad exclusiva e da grond'importanza per sensibilisar e furmar la populaziun en connex cun las tematicas natira, ambient e duravladad.